



## Sommaire

- Ouverture de la séance publique
  - M. Mars Di Bartolomeo, Président
- Ordre du jour
  - M. Mars Di Bartolomeo, Président
- 7095 - Projet de loi portant modification de la loi électorale modifiée du 18 février 2003
  - Rapport de la Commission des Institutions et de la Révision constitutionnelle: M. Eugène Berger
  - Discussion générale: M. Claude Wiseler, M. Alex Bodry (intervention de M. Michel Wolter), M. Claude Adam, M. Gast Gibéryen, M. Marc Baum
  - Prise de position du Gouvernement: M. Xavier Bettel, Premier Ministre, Ministre d'État
  - Vote séparé sur l'article 4 du projet de loi
  - Vote sur l'ensemble du projet de loi et dispense du second vote constitutionnel
- Débat sur la politique de coopération au développement et de l'action humanitaire (suite)
  - Vote sur la motion 1 (rejetée)
- Motion de M. Laurent Mosar relative à la crise humanitaire en République du Yémen (suite)
  - Vote sur la motion (adoptée)
- 7143 - Projet de loi modifiant la loi modifiée du 6 janvier 1996 sur la coopération au développement et l'action humanitaire (suite)
  - Vote sur l'ensemble du projet de loi et dispense du second vote constitutionnel
- 7186 - Projet de loi portant modification de la loi modifiée du 25 février 1979 concernant l'aide au logement
  - Rapport de la Commission du Logement: M. Max Hahn
  - Discussion générale: Mme Sylvie Andrich-Duval, M. Yves Cruchten, M. Henri Kox, M. Roy Reding, M. David Wagner
  - Prise de position du Gouvernement: M. Marc Hansen, Ministre du Logement
  - Vote sur l'ensemble du projet de loi et dispense du second vote constitutionnel
- 7187 - Débat d'orientation sur le financement des grands projets d'infrastructure réalisés par l'État

- Rapport de la Commission du Développement durable: Mme Josée Lorsché (interventions de M. Marc Angel, M. Gast Gibéryen et M. André Bauler) (dépôt d'une motion)
  - Débat: M. Aly Kaes (interventions de Mme Viviane Loschetter et M. François Bausch), M. Georges Engel, M. Gusty Graas, M. Gast Gibéryen, M. Roger Negri
  - Prise de position du Gouvernement: M. François Bausch, Ministre du Développement durable et des Infrastructures (interventions de M. Gast Gibéryen et question de M. Michel Wolter)
  - Vote sur la motion 1 (adoptée)
- 7202 - Projet de loi portant modification de l'article 12 de la loi modifiée du 28 avril 1998 portant
    - harmonisation de l'enseignement musical dans le secteur communal;
    - modification de l'article 5 de la loi modifiée du 24 mai 1989 sur le contrat de travail;
    - modification de la loi modifiée du 22 juin 1963 fixant le régime des traitements des fonctionnaires de l'État
  - Rapport de la Commission de la Culture: M. André Bauler
  - Discussion générale: Mme Octavie Modert, Mme Taina Bofferding, M. Claude Adam, M. Marc Baum
  - Prise de position du Gouvernement: M. Guy Arendt, Secrétaire d'État à la Culture
  - Vote sur l'ensemble du projet de loi et dispense du second vote constitutionnel
- 7212 - Comptes du service intérieur de la Chambre des Députés pour l'exercice 2016
  - Rapport de la Commission des Comptes: M. Marc Lies (dépôt d'une résolution)
  - Vote sur la résolution (adoptée)
- Résolution concernant les comptes de l'exercice 2016 de la Cour des comptes
  - Exposé: Mme Diane Adehm (dépôt d'une résolution)
  - Vote sur la résolution (adoptée)
- Résolution concernant les comptes de l'exercice 2016 du Médiateur
  - Exposé: Mme Diane Adehm (dépôt d'une résolution)
  - Vote sur la résolution (adoptée)

Au banc du Gouvernement se trouvent: M. Xavier Bettel, Premier Ministre, Ministre d'État; M. François Bausch et M. Marc Hansen, Ministres; M. Guy Arendt, Secrétaire d'État.

(Début de la séance publique à 14.03 heures)

### 1. Ouverture de la séance publique

► **M. Mars Di Bartolomeo**, Président. - Kollegeinnen a Kollegen, ech maachen heimat d'Séztung op.

Mir brauchen näischt méi ze soen, also keng direkt Matdeelung, dat kënn dann herno.

### 2. Ordre du jour

Ech wollt der Chamber proposéieren, dass mer direkt mam éischte Projet ufänken an d'Votten - och déi vu gëschter - direkt uschléissend maa-schen. Wann d'Chamber do dermat d'accord ass, dann hu mer d'Votten alleguer op ee Coup.

Sidd Der d'accord, dass mer dat esou maa-chen?

(Assentiment)

Merci, dann ass dat esou decidéiert.

A mir géifen direkt zum éischte Projet de loi vun eiser Dagesuerdnung iwwergoen. Dat ass de Projet 7095, eng Ofännerung vum Wahlge-setz. An de Rapporteur, den Här Eugène Berger, ass scho prett. Dir hutt d'Wuert, Här Berger.

### 3. 7095 - Projet de loi portant modification de la loi électorale modifiée du 18 février 2003

**Rapport de la Commission des Institutions et de la Révision constitutionnelle**

► **M. Eugène Berger** (DP), rapporteur. - Merci, Här President. Ech mengen, mir sinn eis all eens, datt d'Wahlgesetz e Gesetz ass, dat schonn eng besonnesch Stellung huet. Mat der Verfassung leet d'Wahlgesetz virun allem d'Konditioune fest fir ee vun deene wichtegs-ten Akte vu Matbestëmmung an enger Demo-kratie. Ech mengen, d'Wahle si jo wierklech net nëmmen d'Symbol, mä den Ausdrock vun der Matbestëmmung vun de Bierger an engem Land, fir ze bestëmmen, wéi hir Verriedung ausgesäit.

Et ass also e wichtegt Gesetz an et ass och net déi éischte Kéier, datt mer um Gesetz déi eng oder aner Emännerunge virhuelen. Ech wäert och vläicht ganz kuerz eben awer wéinst der Positioun vun deem Gesetz e ganz klengen His-torique oder e puer wichteg Rendez-vousen nach eng Kéier rappeléieren.

Déi éischt „richteg“ Wahlen zu Lëtzebuerg, déi hunn den 19. Abrëll 1848 stattfonnt. Do ass et dorëms gaangen, d'Assemblée constituante ze wielen, déi am Optrag vum deemolege Grouss-herzog Wëllem II. eng Verfassungsreform schreiwen an ofstëmme sollt. En anere wichte-gen Datum beim Wahlgesetz ass d'Joer 1919. Dunn huet Lëtzebuerg de Suffrage universel, also dat allgemengt Wahlrecht agefouert, virun allem hei och mat der Betounung drop, datt d'Fraen och hei d'Wahlrecht kruten.

1972 ass den aktive Wahlalter vun 21 op 18 Joer erofgesat ginn. Dat war also, fir kënne wie-len ze goen. An zanter 2003 kann ee sech och mat 18 Joer schonn als Kandidat opsetzen. - Einfach pour mémoire e puer wichteg Datu-men, wou d'Wahlgesetz emgeännert ginn ass.

Dëse Projet de loi, dee mer haut de Mëtten dis-kutéieren, deen huet sécherlech eng manner grouss Inzidenz wéi elo déi verschidden aner Meilesteng an der Lëtzebuenger Wahlgeschicht.

Ech gesinn, den Här Meyers, dee schéngt do awer net ganz mat mer d'accord ze sinn. Sé-cherlech, eng Emännerung vun engem Wahlge-setz ass ëmmer eppes Wichteges, mä awer vläicht elo hei manner wéi zum Beispill, wéi mer dat allgemengt Wahlrecht agefouert hunn. Et ass ëmmer, wéi een dat kuckt op der - ech soen emol - „échelle de Richter“ vun eisen Emännerungen am Wahlgesetz.

Ech mengen, effektiv hu mer haut eng Emän-nerung, Modifikatioun vun eisem Wahlgesetz, déi och absolutt noutwendeg ass fir d'Ofhale vun den nächsten, iwwernächste Legislativwah-len, fir datt déi konform zu eiser Verfassung sinn a bleiwen. Ech erkläre mech:

Et ass esou, datt mer duerch déi virgezunne Wahle vun 2013, kéint ee soen, aus dem Rhythmus vun de fënnef Joer, déi an der Verfas-sung tëschent zwou Wahle virgeschriwwen sinn, erausgerutscht sinn. An de Moment gesäit den Artikel 134 vum Wahlgesetz vir, datt d'Cham-berwahlen den éischte Sonndeg am Juni statt-fanne sollen.

Deen nämlechten Artikel beseet och, datt am Fall, wou d'Chamber opgeléist gëtt, innerhalb vun dräi Méint Neiwwahlen ofgehale ginn. Dat war esou am Oktober 2013.

A laut dem Artikel 123 vum Wahlgesetz ass d'Sortie, also wann d'Mandat ophéiert vun den Deputéierten, déi aus Neiwwahlen ervirgaange sinn, fir d'Joer no der Ouverture vun der fën-nefter ordinärer Sessioun virgesinn.

„Bon, alles schéin a gutt“, sot Der. Mä déi éischt ordinär Sessioun, déi éischt ordinär Ses-sioun vun dëser Assemblée, fir et emol esou ze soen, déi war konform zum Chambers-reglement am Hierscht 2014. Wann een also dann einfach dat géif weiterrechnen, wat eben am Wahlgesetz steet, da géife mer an d'Joer 2019 erakommen, wat also méi wéi fënnef Joer wieren. Dann hätte mer, wa mer also dat géife maaachen, herno fënnef Joer an aacht Méint no eiser Vereedegung, wou mer Member vun der Chamber gewiescht wieren. Vlächtt hätt deen een oder aneren näischt dergéint, mä ech mengen, hei ass et awer wichteg, datt mer konform zur Verfassung bleiwen, datt mer also duerfir déi Modifikatioune virhuelen, fir datt mer net géint den Artikel 56 vun der Verfas-sung verstoussen, deen ebe festleet, datt d'Mandat vun engem Deputéierten d'Dauer vu fënnef Joer net dierf iwwerschreiden.

A bon, wéi gesot, net dës Inkohärenz, mä dës Dephasage vum Wahlgesetz mat eiser Ver-fassung, oder an der Praxis den Dephasage, dee mer hei kéinte kréien, bréngt mech dann zu der éischter Modifikatioun, déi bei dësem Projet de loi virgesinn ass. Dat ass virun allem eben, datt mer de Prinzip hunn, fënnef Joer Chambersmandat wellen ze erhalen, ze verfestegen. An dëst Gesetz garantiéiert, datt an Zu-kunft d'Legislativwahlen egal wéi ëmmer fën-nef Joer no de leschte Wahle stattfannen, méi präzis am Text - Dir kënn dat do liesen, wéi dat och formuléiert ass -, dee Sonndeg, deen op den Dag vum nämlechte Quantième vun de leschte Wahlen - viru fënnef Joer - fält, respektiv op dee Sonndeg, dee virun de genannten Dag fält.

Dat heescht einfach, wa mer kucken, weini wa-ren déi lescht Wahlen, wëlle mer kucken, datt et am beschte Fall op dee Sonndeg genau fën-nef Joer duerno fält. Wann dat kee Sonndeg ass, da kann et dee Sonndeg virdru sinn. Bei-spill fir déi nächst Wahlen: Déi lescht Chamber-wahlen, déi hunn den 20. Oktober 2013 statt-fonnt. Well den 20. Oktober 2018, also fënnef Joer duerno, op e Samschdeg fält, wäerten dann déi nächst Wahlen op dee Sonndeg vir-drun, also de 14. Oktober falen.

Also nach eng Kéier d'Logik: ëmmer fënnef Joer. Well dat awer net mat de Sonndeger iwwereneeklappt, wann dat also dann net op ee Sonndeg fält, dann ass et dee Sonndeg vir-drun.

An dat neit Gesetz gesäit awer och eng gewësse Flexibilitéit vir, andeem e Règlement

grand-ducal de Wahlsonndeg ëm eng oder zwou Wochen no vir verréckele kann, falls op deem Datum, deen et misst sinn, eng Schoul-vakanz wier oder e gesetzleche Feiertag an et hätt een also aner Evenementer, déi eventuell do kéinte matspillen, wéi gesot Feiertag oder Schoulvakanz.

Dës nei Regelung huet als Konsequenz, datt d'Chamberwahlen net méi wéi bis elo ëmmer am nämlechte Mount musse sinn. Jee nodeem, wéi een da weiterrechent, kéint dat dann och schonn zum Beispill eng Kéier an de Mount September falen. Dat ass net ausgeschloss.

Et ass och net déi éischte Kéier, datt hei zu Lët-zebuerg dat changéiert huet, datt also net déi Regel, wéi mer se bis elo haten, spillt. Am Juni waren zum Beispill nom Zweete Weltkrich siwemol Chamberwahlen (veuillez lire: Et wa-ren zum Beispill säit dem Zweete Weltkrich siwemol Chamberwahlen), déi an en anere Mount gefall sinn.

Eng aner Konsequenz vun dësem Gesetz ass déi, datt mer op alle Fall fir eng gewëssen Zäit weiderhin, géif ech soen, d'Chamberwahlen an d'Europawahle getrennt halen. Ech mengen, och, wann dat elo net onbedéngt de But hei vun dëser Modifikatioun war, ass awer déi zäit-lech Trennung vu Chamberwahlen an Euro-pawahlen a mengen Aen als Rapporteur nëm-men ze begrëissen, well doduerjer kréien da souwuel déi eng wéi déi aner Wahlen och déi Opmierksamkeet, déi se verdéngt hunn a wou dann och an den Debatte virun de Wahlen déi richteg Sujete kënnen debattéiert ginn, wat an der Vergaangenheet vlächtt net ëmmer de Fall war.

Eng drëtt Konsequenz an dësem Gesetz ass, datt all dresseg Joer am Prinzip, mä dat wäert déi éischte Kéier, wéi eben de Kalenner et esou mat sech bréngt, am Joer 2023 sinn, d'Cham-ber- an d'Gemengewahlen alle béid an dat-selwecht Joer falen - hei géife se jo dann an de Mount Oktober falen, well d'Gemengewahle gewéinlech an deem Mount sinn -, wat mer awer och wellen evitéieren.

Ech mengen, och do hu mer schonn déi eng oder aner Diskussioun gefouert, well dee Mix vu Gemengen- an Nationalwahlen am sel-wechte Mount awer och géif vill Interferenze





bréngen, oder net Interferenzen, mä awer vläicht d'Debatt géif e bësselche komplex heiansdo maachen. Duerfir gesäit de Projet hei vir, datt, wann dat esou de Fall ass, also 2023, d'Gemengewahlen an de Mount Juni virverluecht ginn. Dat heescht also, déi nei Gemen-geréit, déi elo konstituéiert gi sinn, déi hunn net grad sechs Joer, wou se wäerten am Amt sinn, mä bis de Juni 2023.

Ech mengen, och hei kann dann iwwer Règle-ment grand-ducal de Wahlsonndeg och nach verluecht ginn, zum Beispill op den zweeten oder den drëtte Sonndeg am Mount Juni.

Dann déi zweet grouss Modifikatioun - hei sinn also e puer verschidde Saachen am Datum -, déi zweet grouss Modifikatioun betrëfft den Ufank an d'Enn vum Deputéiertemandat, déi an Zukunft alle béid fir den drëttén Dönschdeg no de Wahle virgesi sinn. Also d'Mandat, dat also dës Chamber, d'Deputéiert an dëser Chamber ugefaangen hunn, wäert dann den drëttén Dönschdeg d'nächst Joer no de Wahlen zu Enn goen. Dat wäert dann den 30. Oktober sinn. Dat fällt iwwregens dann an eng Schoul-vakanz, Klammer zou. Bis dohinner geet also d'Mandat vun dësen Deputéierten. An dann awer deeselwechten Dag, wou dann d'Opléi-sung ass vun der Chamber, wou d'Mandat vun deenen „alen Deputéierten“, fir et emol esou ze soen, ophält, ginn dann dee Moment och déi nei vereedegt, soudatt also do praktesch en lwwergang ass, wou kee Vide dertëschent ass.

Am Fall vun enger aussergewéinlecher Opléi-sung vun der Chamber gétt d'Enn vum Depu-téiertemandat am Arrêté de dissolution fixéiert. Dat ass jo och eigentlech net den Normalfall.

Déi Fro vum Zäitpunkt, wéini d'Mandat vun den Deputéierten ophält, mir haten do interes-sant Diskussiounen an der zoustänneger Kom-missiou. Ech mengen, och de Statsrot hat a sengem Avis complémentaire eng aner Textpro-pos gemaach wéi déi, déi mir schlussendlech zrëckbehalen hunn. Mä ech mengen awer, datt mer an eiser Majoritéit an der Institutounskom-missiou der Meenung waren, datt dat am End-effekt déi praktikabelst Solutioun wier.

Eng Fro, déi diskutéiert gi war, dat war déi, ob een iwwerhaupt e geneeën Zäitpunkt sollt per Gesetz fixéieren. Dat war eppes, wat mer dis-kutéiert hunn. Dunn ass och d'Fro opkomm, ob et net besser wier, en Zäitraum festzeleeën, wéi zum Beispill datt ee seet, innerhalb vun drësseg Deeg misst d'Chamber zesumme-kommen. Ech mengen, dat wier eng Solutioun gewiescht, déi hätt als Nodeel gehat, datt een hätt missen all Kéiers fir all Period praktesch en neien Datum dann awer fixéieren.

Bon, de Statsrot hat also gesot: „Maacht et op den zweeten Dönschdeg no de Wahlen“, mat dem Argument, wann een et opn den drëttén Dönschdeg no de Wahle mécht, wou déi nei Chamber vereedegt gétt, datt dann am Fall, wou mer an deem Zeenario wieren, wou mer eng opgeléiste Chamber hätten a wou dann eventuellt och nach géif zu deem Moment den Declenchement vum État d'urgence kommen, da géif dat wierklech Schwierigkeete mat sech bréngen, well dat dann, wann een elo den drëttén Dönschdeg hält, iwwert déi zéng Deeg erausgeet, wou eigentlech misst eng Chamber d'Mandat am État d'urgence verlängeren.

Bon, d'Kommissioun huet awer gesot, datt dann - wann een dat wierklech an der Praxis kuckt - eng Regierung eigentlech misst prak-tesch deen Dag, wou d'Wahle sinn, en État d'urgence dekreteieren, wat ee sech net esou onbedéngt ka virstellen. Voilà, also do ass et an der Praxis esou, datt een also schwéierlech an esou en Zeenario ka kommen.

Op där anerer Säit krute mer och gesot, wann een dat den zweeten Dönschdeg no de Wahle mécht, do ginn et praktesch Schwierigkeeten, well näämlech d'Kontroll an d'Proklamatioun, déi offiziell Proklamatioun vun de Wahlresulta-ter an der Vergaangenheet awer ëmmer an der Praxis tëschent zéng a fofzéng Deeg gebraucht hunn, fir datt een dat dann alles, ech soen emol, nogezielt a verifizéiert hat.

Ech mengen, aus all deene verschiddenen Ur-saachen hu mer eis also géeneegt, fir ze soen: „D'Mandat vun deenen alen Deputéierten hält op an dat vun deenen neie fänkt un den drët-tén Dönschdeg no de Wahlen, déi stattfonnt hunn.“

Et sinn also u sech am Endeffekt, kéint ee soen, praxisorientéiert Modifikatiounen vum Wahlge-setz, déi mer haut wäerte stëmmen. Mä mir ginn awer net, ech soen emol, un d'Grondaus-richtung, d'Grondphilosophie vun eiseim Wahl-gesetz respektiv vun eiseim Wahlsystem, do gi mer näischt dru flécken.

Här President, dat sinn eigentlech déi kruzial Punkten aus der Modifikatioun vum Wahlge-setz, dat mer haut hoffentlech mat grousser Majoritéit wäerte stëmmen. Ech wëll awer drop hiweisen, datt nach Aarbechten amgaange sinn an der Institutounskommissioun. De Moment si mer mat engem anere Projet de loi, wou et awer och ëm d'Wahlgesetz geet, beschäftigt, deen als Objet huet, fir ënner anerem d'Brëif-wahl am Wahlgesetz ze änneren. Ech mengen, dat ass eppes, wou mer versichen, d'Brëifwahl opzemaachen, méi einfach ze maachen, duerfir den Accès zu de Wahlen och vläicht erëm méi ze favoriséieren. Ech ginn elo net an d'Detailer an. Dat ass elo och net den Objet vu mengem Rapport. Ech wëll einfach nëmme soen, datt mer wäerten an den nächste Wochen nach eng Kéier eng Diskussioun kréien, wou et da vläicht méi eng méi fundamental Diskussioun geet, wéi ee kann d'Wieler erëm zum Wiele motivéieren.

Voilà, Här President, ech hu versicht, déi wich-tegst Punkten hei kuerz ze skizzéieren. Ech ginn an engems och den Accord vu menger Frak-tioun zu dësem Projet de loi.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Rapporteur. An éischte Riedner zu dësem Projet ass den Här Claude Wiseler fir d'CSV.

#### Discussion générale

► **M. Claude Wiseler (CSV).** - Merci, Här Pre-sident. Ech soen och dem Rapporteur, dem Här Berger, Merci fir säi Rapport. Hien huet och deen noutwendegen historeshen lwwerbléck scho gemaach, wat alles an deene leschte Jor-zéngten an där doter Gesetzgebung scho pas-séiert ass.

Ech mengen, et ass e kuerzen an e wichtigen Text, dee mer haut stëmmen, en noutwende-gen Text, haaptsächlech fir déi nächst Wahlen ze organiséieren, an dat aus e puer Grënn.

Deen éischte Grond, dat ass haaptsächlech d'Feststellung, datt déi aktuell juristesche konsti-tutionell Situatioun awer eng ganz Rei Onkloer-heete mat sech bréngt.

D'Wahlgesetz seet op där enger Säit a sengem Artikel 123, datt d'Wahle stattfannen «le pre-mier dimanche du mois de juin (...) de l'année qui suivra l'ouverture de la cinquième session ordinaire», op där enger Säit, an op där anerer Säit seet eis Constitutioun gradesou kloer, datt «Les députés sont élus pour cinq ans.» Dat heescht, wann een d'Applikatioun vun deem engen a vun deem anere mécht, da komme mer an eng Situatioun, déi net kloer ass, déi onsécher ass. An et ass an deene Matièreen natierlech eviderenterweis wichtig, datt keng Dis-kussiounen iwwert den Datum entstinn an datt eis Texter kloer sinn an datt och bei kengem -Parteien, mä och baussen - kënne Contestat-iounen kommen.

Mir haten déi Onkloerheet schonn eng ganz Rei vu Joren, kann een elo soen. Mir hunn do-madder gelieft. Mä mir haten am Prinzip och elo säit de 50er, 60er Joren am Fong keng Si-tuatioun méi, wou d'Fro sech richtig gestallt huet a wou een hätt missen op déi Fro äntwer-ten. Säit 2013 huet d'Fro sech awer elo erëm e wéineg anescht gestallt. An dofir ass et eng ab-solutt Noutwendegkeet gewiescht, an dat wësse mer säit 2013, säit de Problem sech stellt, eng absolutt Noutwendegkeet, fir also dësen Text esou ze adaptéieren, datt mer all Diskussiounen evitéieren.

En zweete grousser Punkt war am Fong e Punkt, dee mer gemaach hunn als Kommissioun, well mer schonn derbäi waren, den Text ze ma-chen, a well mer du gesot hunn: „Ma da ma-ache mer en och esou, wéi mer en och in-stitutioonell als richtig empfannen.“ Wat ass u sech hei geschitt? Mä et ass u sech d'Regie-rung, déi wollt den Datum vum Juni aus dem Text eraushuelen, an dobäi ass dann och d'Fro gestallt ginn: Wéi laang ass dann d'Chamber, wéini ka se sätzen, wéi laang ass se u sech abe-ruff respektiv wéini ass d'„sortie des députés“, esou wéi dat am Gesetz genannt gétt, wéini hält d'Chambersessioun da richtig op?

An do sinn et eng Rei Froen, déi sech gestallt hunn, déi och an deene leschte Jore kee gréis-sere Problem duergestallt hunn, mä déi, wann een einfach institutionell eng Kéier d'Gedanken driwwer féiert, awer institutionell net zur Satis-faktioun geregelt waren op där enger Säit, a wou an onstabillen Zäite sech och kéint deen een oder deen anere Problem emol stellen. Gott sei Dank hate mer déi Froen net an deene leschten zéng, zwanzeg, drësseg Joer, déi sech gestallt hunn! Mir hunn awer geduecht an der Kommissioun, datt mer déi do Problematik sollte mat léisen.

Wat ass u sech gesot ginn? D'Regierung hat proposéiert, datt mer u sech géifen d'Opléi-sung vun der Chamber maachen op dem Da-

tum selwer, wou Neiwhale wäeren. Dat hätt mat sech bruecht, datt mer déi institutionell Konti-nuitéit net hätte kënne gewäerleeschten, déi mer awer wollte gewäerleeschte mat där neier Proposition. An en fin de compte ass dann d'Kommissioun no laangen Diskussiounen hi-gaangen an huet eng Ännerung op de Regie-rungstext agefouert, déi doranner bestanen huet, datt mer gesot hunn, datt d'Chamber kéint esou laang siegéieren, dat heescht am Amt wär, bis déi nei Chamber an d'Amt kënnt.

Wat heescht dat praktesch? Mä domat hu mer u sech eng Vacance vun der Chamber suppléiert. Domat hu mer u sech d'Chamber esou laang fonctionnéiere gedoen, wéi och eng Regierung fonctionnéiert. Och wann d'Re-gierung no de Wahlen nëmmen Affaire-cou-ranteë méi mécht, huet d'Chamber awer ëm-mer nach eng Kontrollföncioun. Déi ka se dann elo bis zum Schluss ausüben. Dat fanne mer eng gutt an dat fanne mer eng richtig Saach.

An deen zweete Punkt, dat ass, datt mer och reaktiounsfäeg sinn en cas d'urgence, wann eppes géif an deenen zwou, dräi Wochen de vacance vun der Chamber hei virkommen. Dat wär problematesch ginn no deenen ale Ge-setzgebungen. Mat deem neie Gesetz ass dat kee Problem méi, well d'Chamber dann - déi al respektiv duerno déi nei, mä während där Zäit déi al - reaktiounsfäeg ass. Mir garantéieren also hei eng Kontinuitéit vun der Institutoun Chamber.

Déi eenzeg kleng Lacune, déi sech nach stellt, dat ass am Fall, wou et vun enger opgeléiste-ner Chamber handelt. Da gétt d'Dissolutioun vun der Chamber duerch Arrêté festgesat. Hei kann et also nach an deem präzise Fall virkom-men, datt mer nach zwou, dräi Woche Vacance du pouvoir hätten. Mä dat wäert och, wann eng nei Verfassung kënnt, an där Verfassung mat geregelt ginn, soudatt mer dann all Méi-glecheeten do aus dem Wee geraumt hunn.

An da kënnt dee leschten Artikel aus dësem Gesetz. Dat ass deen, deen den Datum vun deenen nächste Wahle festsetzt, deen u sech och d'Fro stellt, wéini déi nächst Wahlen da solle sinn. An do hate mer, an ech soen dat och ganz einfach hei, eng ganz Rei Diskussiounen am Fong säit 2014 driwwer. Am Januar 2014 war den „100,7“ bei all Partie gaangen an huet am Fong eng Ëmfro gemaach, wéi déi eng an déi aner sech géifen dozou stellen. An d'Äntwerte waren déizäit am Fong ganz anerer wéi déi, déi mer haut an dem Gesetzestext erëmfannen.

Et ass gesot ginn, datt, och wann - den Här Bo-dry huet dat gesot am Numm vun der LSAP - et konstitutionell esou wär, datt am Hierscht 2018 misst gewielt ginn, da wär dat net ideal, well mer dann eng ganz Rei Froe vum Budget net geléist hätten, deen an enger präziser Pro-zedur misst gemaach ginn. Dofir huet hie sen-gerzäit derfir plädéiert, fir am Juni 2018 d'Chamberwahlen ze maachen.

De Paul-Henri Meyers huet datselwecht sen-gerzäit gesot, d'DP an d'ADR och. An déi gréng hate sech nach net...

#### (Interruption)

...déi gréng hate sech nach net festgeluecht sengerzäit. An datselwecht...

#### (Interruptions diverses)

...stoung an engem Procès-verbal vum 5. Fe-bruar 2014, wou de sozialistesche Grupp gesot huet: «Il n'y a pas de préférence pour l'une ou l'autre date. Si le mois d'octobre est maintenu, des discussions sur la procédure budgétaire sont de mise.» Wat jo och sengerzäit richtig war.

An et ass eréischt an enger zweeter Etapp, wou d'Iddie geännert hunn a wou d'Proposition du kumm ass, fir u sech net den Datum vun de Chamberwahlen ze änneren, fir deen Oktober 2018 festzesetzen, mä fir dann an deene Joren, wou Chamberwahlen a Gemengewahlen an datselwecht Joer géife falen an dann an der Fol-leg dovunner och an deeselwechte Mount, fir dann net d'Chamberwahlen ze deplacéieren, mä datt mer dann an deem Moment géifen d'Gemengewahlen deplacéieren, mat dem Ar-gument, datt dat och gesetzlech méiglech wär - ass dee Moment gesot ginn - an datt eng Dis-solutioun vun der Chamber, fir d'Chamberwah-len am Juni 2018 ze maachen, schwierig wär.

Ech wëll kloer soen: D'CSV-Fraktioun ass mat där dote Proposition net averstanen! An dofir gétt et e puer Grënn, déi ech einfach hei wëll opzielen.

Mir sinn u sech nach wie vor der Meenung, datt Juni 2018 - wie wonnert et? - dee besseren Datum gewiescht wär, verstinn awer, datt dat konstitutionell net evident ass an datt do eng Rei Schwierigkeete sech kënne stellen.

Deen zweete Punkt, dat ass, datt mer, wann et dann esou ass, datt d'Chamberwahlen am Ok-

tober stattfannen, domat kënne averstane sinn, mä dann ass et an eisen Aen awer net problematesch, fir déi zwou Wahlen op engem gemeinsamen Datum ze organiséieren. A mir fannen et haaptsächlech besonnesch, datt een, wann een de Problem vum Datum vun de Chamberwahlen wëllt léisen, domat dann d'Mandat vun de Gemengeréit verkierzt!

A mir hätten am Prinzip och nach kënne mat op deen do Wee goen a mat iwwert deen do Wee nodenken, mä dann hätt een awer a priori missen de Gesetzestext virun de leschte Ge-mengewahle maachen. Well mir fannen et awer besonnesch, elo no de Gemengewahlen hinzegoen, do wou d'Gemengeconseillere fir sechs Joer gewielt sinn, an elo an dësem Mo-ment de Gemengeconseilleren dann hiert Mandat ze verkierzen. Dat heescht jo effektiv eng Verkierzung vun de Gemengeconseilleren hire Mandater.

Mir fannen et och besonnesch, datt fir déi Ver-kierzung och d'Representanten, notamment de Syvicol, net gefrot gi sinn. An dat heescht net nëmmen d'Verkierzung an der nächster Legis-laturperiod, dat heescht vun deene Gemenge-conseilleren, déi elo en place sinn, mä et heescht am Prinzip jo och d'Verlängerung iwwer sechs Joer eraus vun deene Gemenge-conseilleren, déi an de Wahlen duerno dann en place kommen.

Mir fannen dat net dee richtige Wee. An dofir wëlle mer och deen Artikel net matstëmmen.

A schlussendlech als lescht Argument soe mer, datt déi Solutioun, déi elo hei fonnt ginn ass, och nach ee vun de Problemer net léist. An dat ass dee vun de Budgetsprozeduren, dee mat de Chamberwahlen, déi elo am Oktober stattfan-nen, och nach net geléist wär, obwuel een ëm-mer duerno praktesch Léisungen - dat gesi mer jo och - zu deem do Problem ka fannen. Mä et vereinfacht enger neier Regierung, wéi se och ëmmer ausgesäit, de Problem ronderëm d'Wahlen net, a respektiv och beim Untrëtt net, well se sech sofort muss drëm bekëmmen, fir e provisoiresche Budget ze stëmmen, an duerno am Ufank vun deem Joer drop dann Aarbechte mat der Verfassung vun engem neie Budget muss entameieren.

A mir hu jo d'Erfahrung 2013 gemaach, wat fir eng Kontradiktioun kënne vum éischte Bud-get op deen nächste Budget dann awer ent-stoen.

En résumé vun deem, wat ech wëll soen: Mir si mat deenen dräi éischten Article vum Gesetz selbstverständlech d'accord. Mir begrëissen déi 100%eg. Déi sinn och zu engem Deel an der Kommissioun entstanden deelweis op Initiativ vum Paul-Henri Meyers, dee sech vill fir déi éischt dräi Artikelen och agesat huet. Domat si mer d'accord. Mir begrëissen déi.

Mir sinn net d'accord mam Artikel 4 a mir froe fir den Artikel 4 e Vote séparé, fir dat och ganz kloer ervirzesträichen, mat wat mer d'accord sinn a mat wat mer net d'accord sinn. An ech denken, Här President, datt ech d'Enner-stëtzung vun der CSV-Fraktioun, also nom Arti-kel 46 vu méi wéi fënnf Deputéierten hunn. An dann, stëmmt d'Majoritéit den Artikel 4 awer, da wäerte mir eis beim gesamten Text am Vott duerno enthalen.

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Wiseler. An als Nächsten huet d'Wuert den Här Alex Bodry fir d'LSAP.

► **M. Alex Bodry (LSAP).** - Här President, Dir Dammen an Dir Hären, den Eugène Berger huet als Rapporteur, deem mer och Merci soe fir seng Ausféierungen hei an dëser Chamber, schonn den Detail duergeluecht vun deem heite Gesetzesprojet. Ech wëll elo net nach eng Kéier alles dat repetéieren, wat hie gesot huet, mä eigentlech op eenzel Aspekter agoen, déi weisen, wéi grondleeënd déi Ännerungen dach scho sinn, déi mer hei an deem heiten Text maachen.

Dat gesäit alles esou anodin aus, mä hannen-dru verstoppe sech awer eng ganz Rëtsch vu prinzipiellen Decisiounen, déi mer hei indirekt zumindest geholl hunn an déi eis virun allem méi Rechtssécherheet bréngen an Zukunft, well mir müssen éierlech zougestoen, dass mer e bëssen Navigation à vue während laange Jor-zéngte gemaach hunn, wat trotzdem essen-ziell Froe betrëfft vum Fonctionnement vun ei-sen Institutounen. Duerfir sinn ech eigentlech frou, dass mer deen heite Geste maachen. An ech bedauern, dass déi gréisste Partei hei an dësem Parlament wahrscheinlech sech wäert abstenéiere bei esou engem wichtigen Text. Dat léisst mech dach e bëssen erstaunen. Ech kommen herno nach eng Kéier dorobber zrëck.

Ursprénglech sollt et jo bei dëser punktueller Reform vum Wahlgesetz ausschliesslech ëm d'Fro vun der Festleung vum Wahldatum goen. Dat war déi Haaptausrichtung, well mer





konfrontéiert si mat engem Bouleversement vun eisem traditionelle Kalenner, wéi mer en zënter de Wähle vum Mee '74 hei zu Lëtzebuerg kannt hunn, wou ëmmer Wähle waren eben an der Period Mee/Juni, oder Juni/Mee misst ech praktesch soen, well eist Wahlgesetz vum Juni schwätzt. Mä dat kann awer deemno wéi, och bei Europawahlen, anescht festgeluecht ginn, wou mer elo komplett also vum „Spéitfréijoer“, loosse mer esou soen, an den Hierscht praktesch klamme mat eise Wahlen.

An dat ass schonn eng Ännerung, well dat jo eise Rhythmus och duerjerneegheit an effektiv och en Impakt huet op aner Prozeduren hei am Parlament, wéi d'Ausarbechtung vum Budget, deen traditionell ebe grad an deen Hierscht do fält, a wou natierlech mat deem neie Kalenner dat indirekt och Auswierkungen op d'Opstellung respektiv och op d'Bestëmmung vum Budget vum Joer drop huet. Et ass also net en Niewenaspekt, dee mer hei ze kucken haten.

Mä virun allem awer ass et der Koalitioun, ass et der Regierung drëm gaangen, dass mer mat engem Verfassungsbroch eigentlech Schluss maachen. Et ass en haart Wuert, mä et ass eigentlech näischt anescht, well eist Wahlgesetz - an dat ass net nëmme de leschten Text vun 2003, mä et ass schonn am Text vun 1924 dra gewiescht -, well eist Wahlgesetz also virgesäit, dass, wann et zu enger fréizäiteger Opléisung vum Parlament kënn, dann u sech déi Period, déi duerno ass, eigentlech ka méi laang wéi fënnf Joer daueren. An dat ass och an deene Kéieren, wou et zu enger fréizäiteger Opléisung vum Parlament koom, esou gehandhabt ginn. An do huet ni eng Chamber eppes dobäi fonnt. Et huet ni e Conseil d'État eppes dobäi fonnt.

D'Verfassungsgeriicht hate mer glécklecherweis nach net deizäit. An et gesäit een och, dass, menger Usicht no, wéi déi Verfassungskontroll nach net bestanen huet, och relativ lichtfankeng mam Verfassungstext ëmgesperonge ginn ass. Gott sei Dank hu sech déi Mentalitéiten a Reflexer geännert, soudass elo vill méi Suerg gedroe gëtt, dass och de Verfassungstext respektéiert gëtt, fir net e kompletten Duerjerneen an eise Rechtsuerdnungssystem eranzekréien.

Eis Verfassung ass näamlech ganz kloer! D'Verfassung seet: „D'Chamber ass fir fënnf Joer gewielt.“! Si kann natierlech opgeléist gi virun, dann ass d'Mandat méi kleng, mä et kann net sinn an enger Demokratie, dass d'Chamber sech verlängert. Wou géif een do Schluss maachen? Bei fënnf an en halleft Joer, bei sechs Joer an esou virun an esou weider? Also, dat geet net! An duerfir muss een dat och ganz strikt ausleeën. An duerfir sinn ech eigentlech fro, dass dës Koalitioun, dës Regierung an duerno och d'Chamber eigentlech der Meenung waren, dass mat deem Unfug misst opgehéiert ginn an dass also déi Traditiounen an dat Wahlgesetz, wat mer hunn, net méi haltbar wäeren an dass et héich Zäit géif ginn, dass mer géifen dat Wahlgesetz konform maachen zu eiser Verfassung.

Dat heescht also, dass eng Chamber nëmme ka maximal fënnf Joer a Fonctioun sinn a Wahlen also musse spéitstens no fënnf Joer all Kéiers erëm stattfannen. Dat gëtt elo gemaach.

Dat huet zur Konsequenz, dass dës Chamber an dës Regierung net profitéiert vun deem, wat nach gegollt huet bei där Regierung a Majoritéit a Chamber, déi am Dezember 1968 gewielt ginn ass. Du war et och zu enger fréizäiteger Opléisung vum Parlament komm an dunn huet déi Mandatsperiod duerno fënnf Joer a fënnf Méint gedauert. Déi ass bis de Mee 1974 gaangen an net bis Dezember 1973, wéi et mat enger strikter Applikatioun vum Verfassungstext hätt misse geschéien.

Deen Unfug ass eriwwe. Hei gëtt sech un de Verfassungstext gehalten an d'Wahlgesetz gëtt elo iwwerfällg dann och zrëckgestutzt op dat, wat eis Verfassung iwwerhaupt méiglech mécht.

Do hu mer jo en Accord, fir dat doten ze maachen. Et ass och gutt esou, dass mer dat hei maachen. Ech bedauere just, dass mer eis ni éischter mat där doter Saach offonnt hunn. An et ass och keck ze liesen, wéi schnell de Conseil d'État a sengem Avis op déi dote Fro agaangen ass. An engem Saz sot en, e géif d'Appreciatioun deele vun den Auteurs vum Text. An do duerch huet en net missen op seng eege Jurisprudenz respektiv seng eegen Avisen, an där ginn et der eng ganz Partie aus der Vergaangenheet, zrëckkommen, wou en all Kéiers d'Wahlgesetz eigentlech als gutt befonnt huet an net a Relatioun gesat huet mat eisem Verfassungstext. Also, et gëtt héich Zäit, dass mer deen heite Geste hei maachen!

Dann huet sech d'Fro gestallt, nodeem mer dat festgestallt hunn: Wëlle mer elo an en Oktober-rhythmus erakomme vun de Wahlen oder wëlle mer zrëckkommen op e Junirhythmus, wéi mer en eigentlech haten? An et ass gemengt ginn, éischstens, dass et en fait eng gutt Saach wär,

dass mer Europawahlen an Nationalwahlen vuneen trennen. Déi meescht Parteien hu sech eigentlech scho méi laang fir esou eng Léisung ausgeschwat gehat, dass een net um selwechte Moment sollt Europawahlen an Nationalwahlen hunn, well et awer zwou verschidde politesch Wähle si mat aneren Enjeuen, mat aneren Zilsetzungen, a wou et net gutt ass, déi komplett Vermëschung vun deem engen a vun deem aneren ze hunn. Dat gëtt domadder realiséiert, wa mer elo an en anere Rhythmus vu fënnf Joer erakommen.

A wéi gesot, et huet sech och d'Fro gestallt, wéi fest dass mer dat géifen zurren. An do hu mer schlussendlech hei eng Léisung zrëckbehalen, déi eng gewësse Flexibilitéit zouléisst. Mir schreiwen net hei an, dass an Zukunft all Kéiers am Oktober all fënnf Joer musse Wähle sinn, mä mir ginn eigentlech vun dem Moment vun de leschte Wahlen aus a mir soen: „Mir kucken da fënnf Joer no vir, an dee Moment si Wahlen.“ a wann dat eben net mat engem Sonndeg klappt, dann ass et dee Sonndeg virun, wou d'Parlamentswahlen stattfannen.

Dat heescht also, wann et géif erëm eng Kéier zu enger fréizäiteger Opléisung vum Parlament kommen, da kann ee mat deem heiten Text hei weiderfuere. Da spillt vun deem Moment un erëm eng Kéier déi Fënnfjoresregel, wat d'Fixatioun vun deem nächste Wahltermäin ugeet. Also, déi heite Léisung gëtt eis eng gewësse Flexibilitéit fir d'Zukunft.

Ech bleiwen der Meenung, dat kann ech awer hei nëmme a titre personnel soen, dass den aktuellen Oktoberrhythmus, an dee mer elo, zumindest bis zu den nächste Wahlen, schéngt et mer, drakommen, u sech net gënschteg ass mam Timing, wéi de Budget opgestallt géif ginn. Dat heescht praktesch, dass déi al, déi austriedend Regierung nach de Budget opstellt an dass déi nei dann - wann et eng nei Regierung gëtt - dee Budget deckt. An da misst praktesch, wéi mer dat jo och gemaach hunn an dëser Period am Dezember 2013, provisoersch eigentlech e Budget gestëmmt ginn, deen dann an de Méint drop vun dem éischte Joer an en definitive Budget ëmgeännert gëtt. Dat gëtt elo dee Rhythmus, an dee mer normalerweis drakommen.

Bon, et gëtt Schlëmmeres op der Welt, mä et muss ee sech d'Liewen net onbedéngt schwéier maachen. Duerfir kann een an aller Rou, mengen ech, nach eng Kéier diskutéieren, net iwwert de Wahltermäin, mä iwwert d'Fro, ob mer eise Budgetsmechanismus, wéi mir e kennen, ob mer dee bäibehalen. Well et ginn aner Länner, déi e ganz anere Kalenner hunn, fir de Budget opzustellen, wéi mir dat hei zu Lëtzebuerg hunn. Also, et ginn och do aner méiglech Prozeduren, fir dat vläicht méi an Aklang ze bréngen mat eise legislative Constraints, déi mer dann hunn.

Gutt ass et, dass mer och nach eng zweet Wahlrechtsreform maachen. Do schaffe mer jo och intensiv drun. Do geet et haaptsächlech, mä net nëmme, ëm d'Verallgemengerung a Vereinfachung vun der Bréifwahl, wat d'Konditiounen ugeet an och wat d'Delaien ugeet. Dat, mengen ech, ass eppes Positives, wa mer dat maachen, fir an engem Land, wou Wahlpflicht besteet, all de Leit d'Méiglechkeet ze ginn, fir sech och un deene Wahlen ze bedeelegen.

Wat ech perséinlech bedauern, mä dat geet leider net anescht, well mer déi Dispositioun an eiser Verfassung stoen hunn an zumindest eng Partei jo deklaréiert huet, dass se net méi wëllt punktuell Verfassungsännerunge matmaache bis zu den nächste Wahlen, dat ass eise Validatiounssystem vun eise Legislativwahlen. Mir hunn hei zu Lëtzebuerg e System, mat e puer anere Länner an Europa, wou et déi Gewielte selwer sinn, déi decidéieren, ob se richtig gewielt sinn. Dat heescht, déi nei gewielte Chamber validéiert hir eege Wahlen!

An do gëtt et entre-temps en Arrêt Grosaru, dee betrëfft Rumänien, mä déi hunn eng äänlech Dispositioun an hirer Verfassung stoen, wéi mir se an der Lëtzebuurger Verfassung stoen hunn. D'Belsch hunn och datselwecht. Et ass en Arrêt vum Europäesche Mënschenrechtsgerichtshaff vum 2. Mäerz 2010, dee gesot huet: „Dat do geet net! Dat do geet net, well dat doten net d'Apparence huet vun enger onofhängeger Instanz par rapport zu deem Contentieux, dee bei hir virbruecht gëtt, well déi Leit kéinte jo emol e gewëssene Parti pris hunn, wat d'Validatioun vun hiren eegene Wahlen ugeet.“ An duerfir ass sengerzäit Rumänien veruerteelt ginn op deem dote Punkt.

Elo muss ee kucken, ob dat an alle Fäll esou wär, wann e Land mat enger grousser demokratescher Traditioun esou ee System huet, ob dat net méi flexibel géif gekuckt ginn. Mä nach wie vor hu mer eis déi Fro gestallt a mir hunn an eisem neie Verfassungstext, dee mer proposéieren, eis och géeneegt, fir do eng Rekurs-

méiglechkeet elo beim Verfassungsgericht virzegesinn. Et ass och gutt, dass dat esou ass.

Ech wollt nach, Här President, op eng Partie Froen agoen a mer mussen och ëmmer eis bewosst sinn, dass mer Deeler vun deene Punkten, déi mer hei tritéieren an där Wahlgesetzreform, och erëmfannen op där enger Säit an der Verfassung, déi eis de Kader setzt, an dass mer op där anerer Säit och am Reglement vun der Chamber Elementer hunn, déi hei mat-spillen zu deem ganze Froekomplex, dee mer hei versicht hunn ze definéieren an och juristes hieb- und stichfest ze regelen, wat haaptsächlech d'Fro ugeet: Wéi laang ass eng Chamber a Fonctioun? An déi Fro och: Wéini kënn et eng nei gewielte Chamber zesummen?

Dat sinn alles spannend Froen, déi mer laang an der Verfassungskommissioun, scho wéi et ëm d'Verfassung gaangen ass, diskutéiert hunn. An déi Diskussioun hu mer hei erëmfonnt bei dëser Diskussioun. Mir haten eis och, wéll ech och soen, am Artikel 69 vun eiser Proposition de révision vun der Verfassung scho géeneegt, dass mer géifen draschreiwen, dass d'Chamber sech an effentlecher Sitzung den drëtten Dënschdeg no de Wahlen zesummenfënn, fir d'Vérification des pouvoirs vun hire Memberen duerchzeféieren. An déi Iddi hei hu mer eigentlech elo virgezunn a sinn op déi dote Méiglechkeet gesprongen, fir déi Klarifikatioun am Wahlgesetz ze kréien.

An Zukunft ass et also esou, ausser wann et zu enger fréizäiteger Opléisung vum Parlament kënn, also zu virgezunnene Wahlen kënn, dass am Normalfall also déi austriedend Chamber éischstens emol net opgeléist gëtt. Den Arrêté grand-ducal wäert an Zukunft just virgesinn, dass en Datum fir Wahlen fixéiert gëtt. Doduerjer wäert déi al Chamber a Fonctioun bleiwen, bis déi nei Chamber a Fonctioun trëtt, dat heescht bis dee Moment, wou dann och a date fixe den drëtten Dënschden no de Wahlen déi nei Chamber automatesch zesummekënn.

Domadder hu mer och d'Fro geléist: Ma wien decidéiert dann, wéini déi nei Chamber zesummekënn? Eng interessant Fro, déi hei zu Lëtzebuerg all Kéiers erëm zu neien Diskussiounen gefouert huet, all fënnf Joer, wann et dann esou wäit war. A komescherweis war et hei de Statsminister - Dir kënn lech erënneren, Dir hutt al-leguer esou e Bréifche kritt -, dee matdeelt huet, dass Der gewielt gi sidd, a gläichzäiteg ass och dann eng Convocatioun komm fir déi éischt Sitzung. Dat heescht, d'Exekutiv faisant fonction, „geschäftsführend“, wéi se an Däitschland elo ganz oft soen, déi seet eigentlech, wéini dass d'Chamber zesummekënn. A wann déi net wëllt, weess ech net, opgrond vu wat a wie géif decidéieren, dass déi nei Chamber géif zesummekommen, well mer haut an eisen Texter déi Iddi vum weideren A-Fonctioun-Behale vun der Chamber iwwert de Wahltermäin eraus eigentlech net kloer verankert hunn.

Dat ass an Zukunft anescht mat deem heiten Text. Mir kréien also do vill méi Rechtssécherheet a mir hunn och, ausser wann et, wéi gesot, zu virgezunnene Neiwahlen kënn, kee politesche Vakuum. Deen entsteet doduerjer, dass zwar eng geschäftsführend Regierung nach ëmmer am Amt ass - wou et jo net kloer ass zu Lëtzebuerg, wat déi dierf a wat se net dierf maachen -, awer gläichzäiteg kee Parlament méi do ass, fir déi Regierung ze kontrolléieren.

Dat ass eng anormal Situatioun. Et ass déi, mat där mer hei zu Lëtzebuerg eigentlech zënter Eiwegkeete liewen. Dat kréie mer heimadder ewech. Dat gëtt also vill méi kloer. D'Chamber wäert also weider bestoe bleiwen, bis déi nei Chamber a Fonctioun trëtt.

Anescht ass et noutgedrungeneweis, wann et zu enger virgezunnener Wahl kënn. Dee Moment muss d'Chamber opgeléist gi vum Grand-Duc. An eng opgeléist Chamber, jo, déi kann ee kaum erëm eng Kéier opliewe loosse. Eise Wonsch ass allerdéngs, dat hu mer och kloer an der Kommissioun gesot, dass awer dee Moment, wou den Arrêté grand-ducal geholl gëtt vun der Opléisung vun der Chamber, deen Datum vun der Opléisung soll méiglechst no beim Wahltermäin sinn, fir dass also esou laang wéi méiglech nach déi gewielte Chamber a Fonctioun bleift, fir eventuell kënnen zesummegeruff ze ginn oder zesummenezekommen, wann iergendwellech Schwierigkeete sech géife stellen.

Alles dat ass also, mengen ech, e ganz kohärent System, dee mer eis hei ausgeduecht hunn an deen och gutt ka funktionnéieren.

Déi Fro, déi sech hei gestallt huet, ass - déi huet sech virun ni esou gestallt, well mer eben déi Juniregelung hate fir d'Chamberwahlen, a mir haten eng Zweete-Sonndeg-am-Oktober-Regelung fir d'Gemengerotswahlen -, dass al drësseg Joer Gemengerotswahlen a Chamberwahlen am selwechte Mount ofgehalen ginn oder souguer deeslechten Dag missten

ofgehalen ginn. An esou en exzeptionellt Element - ech weess net, ob dat elo Sonnenfinsternis ass oder Mondfinsternis, wou zwou Saachen also zesummen iwwereneeschneiden -, dat hätt mer jo elo am Joer 2023, wou mer deeslechten Dag, de 14. Oktober, dat ass den zweete Sonndeg, Chamberwahlen a Gemengerotswahlen hätten.

A mir waren a grousser Majoritéit an der Kommissioun der Meenung... An dat war, muss ech soen, am Ufank och net vun der CSV contestéiert, dat wëll ech hei soen. Déi Contestatioun ass eréischt komm, wéi d'Regierung hire Regierungsprojet virgestallt huet. A virun hate mer eng Kéier rieds an der zoustänneger Kommissioun doriwwer, wou och matgedeelt ginn ass, dass een op esou ee Wee wëllt goen. A sengerzäit huet kee vun der CSV protestéiert géint déi do Regelung. Duerfir war ech, muss ech soen, bass erstaunt, dass, wéi d'Regierung dat da public gemaach huet, op eemol effentleche Protest vun eenzelne prominente Membere vun der CSV komm ass, déi awer drolegerweis net Member vun der zoustänneger Kommissioun waren, wou dat doten am Virfeld eng Kéier och diskutéiert gi war.

Bon, et schéngt wéi wa sech deen dote Fligel an der CSV elo duerchgesat hätt, wann ech elo dem Här Wiseler seng Ried hei richtig interpretéieren. Dat beweist nëmme eent: dass vläicht dës Regierung aus dräi Parteien besteet, mä dass manifestement an der CSV mindestens zwou Parteien sinn.

► **Plusieurs voix.** - Très bien!

► **M. Alex Bodry** (LSAP). - Dat gesot, wëll ech awer...

(*Interruptions diverses*)

Dat gesot, wëll ech awer hei soen, mir schéngt awer déi Léisung, déi ass jo net dans un esprit partisan geholl ginn. Si ass jo geholl gi virun deene leschte Gemengerotswahlen. Mir si jo alleguerten hei am selwechte Boot, all d'Gemenge sinn am selwechte Boot, wou mer gesot hunn: Wat maache mer? Ass et gutt, dass mer deeslechten Dag zwou vun dräi - mir kennen hei zu Lëtzebuerg nëmme dräi politesch Wahlen, an dat sinn d'Gemengerotswahlen, dat sinn d'Chamber-, dat sinn d'Europawahlen -, ass et gutt, dass mer um selwechten Dag, nodeem mer eis elo all felicitéiert hunn, dass d'Europawahlen an d'Chamberwahlen net méi deeslechte Moment sinn, ass et gutt, dass mer elo géifen dann deeslechte Moment Gemengerotswahlen a Chamberwahlen hunn?

Déiselwecht CSV war jo ëmmer der Meenung, et kéint een och de Referendum net koppel mat iergendwellechen anere Wahlen. Wéi ech emol eng Kéier gewot hunn ze proposéieren, et sollt ee vläicht Gemengerotswahlen a Referendum iwwert d'Verfassung matenee koppelen, ass gesot ginn: „Dat geet net! Dat kann net deeslechte Moment stattfannen, well dat géif d'Leit duerjerneemaachen.“ Dat wieren zwou verschidde Saachen. Abee, dat géllt och fir d'Gemengerotswahlen a fir d'Nationalwahlen. D'Enjeue si ganz anescht, d'Konstellatiounen si komplett verschidden an d'Campagné ginn och vläicht verschidde gefouert. Dat eent si lokal Campagnen, dat anert sinn national Campagnen. An et soll een déi zwou Saachen, menge mir op jidde Fall als LSAP-Fraktioun, net matenee vermëschen.

Duerfir si mer der Meenung, dass mer eng Trennung musse maache vun deem Ganzen. An da schéngt et mer net onlogesch ze sinn, dass een dann déi Period vu sechs Joer - wat eng ongewéinlech laang Period ass an enger Demokratie, dass een eigentlech nëmme all sechs Joer Wahlen mécht fir e wichtegt Gremium -, dass een déi hei ëm dräi bis véier Méint verklengert. Ech mengen, dass dat kenger Gemeng schuet, dass all Gemeng kann - si si jo alleguerten eréischt ganz am Ufank, si si jo eréischt an den éischten Deeg a Woche vun hirer neier Period - sech parfaitement dann organiséieren.

Wat sech wäert änneren - wat sech wäert änneren, do sinn ech sécher: Et wäerten am September 2023 manner Aweijunge sinn! Déi wäerten dann am Mee/Juni 2023 stattfannen.

(*Hilarité*)

Mä mat deem doten Ennerscheid, mengen ech, dass dat dote sech vertriee léisst.

(*Interruptions*)

Wéi gesot, d'CSV huet, bis d'Regierung et offiziell no baussen ugekënnegt huet, och kee Problem eigentlech domadder gehat. An ech mengen, dass ech et schued fannen, dass sech déi verstänneg Stëmmen an der CSV op deem





dote Punkt net konnten duerchsetzen. Dat ass dann eben esou. Ech hoffen, dass dat eng Ausnamerscheinung bleibt bis zu den nächste Wahlen.

Dat gesot, wäert d'LSAP deen heiten Text stëmmen.

Merci.

► **Plusieurs voix.** - Très bien!

(Brouhaha)

► **M. Michel Wolter** (CSV).- An dee vun '23 op '29, wéi laang ass deen an de Gemengen dran, Här Bodry? Wéi laang?

► **M. Alex Bodry** (LSAP).- A wat fir enger Prozedur si mer, Här President?

► **M. Michel Wolter** (CSV).- Sechs an en hal-left Joer! Sechs an en halleft Joer!

(Interruptions)

► **M. Mars Di Bartolomeo**, *Président.*- Merci, Här Bodry. Eisen nächste Riedner ass den Här Claude Adam fir déi gréng. An hien ass scho prett.

(Brouhaha)

Sou, wann ech gelift! Elo huet just den Här Adam d'Wuert. Wann Der lech eppes ze soen hutt, frot lech d'Wuert, wann ech gelift!

► **M. Claude Adam** (*déi gréng*).- Merci fir d'Wuert, Här President. Mam Projet de loi 7095 ännere mer d'Wahlgesetz. D'Wahlgesetz ass e wichtegt Gesetz. Duerfir ass selbstverständlech dësse Projet de loi och wichteg, net nëmme fir eis heibannen, mä fir all Bierger hei am Land.

Dem klengen Historique vum Här Berger brauch ech näischt bäizeflecken. Ech soen him Merci fir dësen Historique a fir säi mëndlechen a säi schrëftleche Rapport.

De Projet de loi vun haut de Mëtteg ass, wéi gesot, e wichtege Projet. Et geet engersäits drëm, d'Datume vun de Wahlen ze réckelen, oder loosse mer soen anescht festzeleeën, an et geet awer och drëm, datt mer d'Opléisung an d'Erneuerung vun der Chamber anescht regelen. Meng Virriedner si schonn dorobber agaangen.

Firwat ass dëst Gesetz noutwendeg ginn?

Majo, et ass schonn zweemol vum Rhythmus geschwat ginn. Mir si mat de virgezunnene Wahle vun 2013 aus dem Rhythmus komm. Dunn hu mer fir d'Eischt en neien Datum gebraucht. D'Chamberwahle sinn ëmmer um éischte Sonndeg am Juni gewiescht. An de Rapporteur huet och erkläert, datt mer dann d'Chamberwahlen eréischt a fënnef Joer an aacht Méint gehat hätten, wa mer näischt géife maachen. Mä mir konnten awer och net näischt maachen, well eben an der Verfassung steet, datt ee Mandat géif fënnef Joer laang daueren.

Mir halen déi Logik vu fënnef Joer bäi. An et soll awer och ëmmer de Wahldag sonndes sinn. De Wahlsonndeg ka geréckelt ginn, wann en an eng Schoulvakanz fält. Et kéint ee sech froen, ob dat nach muss néideg sinn, fir de Wahlsonndeg ze réckelen, well mer virun allem jo och d'Bréifwahl méi wäit wellen opmaachen. Mir sinn allerdéngs der Meenung, dach, dat wier gutt, de Wahlsonndeg soll nach och déi Bedeitung behalen, déi en am Moment huet, och wa mer duerch d'Bréifwahl eng Rei Ännerunge kréien. Mä dat ass jo e Projet, deen nach ënnerwee eréischt ass.

D'Chamberwahle sollen och net mat de Gemengewahle sinn. Dat wier schonn am Joer 2023 souwäit. Déi Debatt, wa Chamberwahlen a Gemengewahlen um selwechten Dag wieren, déi wier ganz schwéier hei am Land ze féieren, virun allem och, well mer eis jo net kënne vun den Duebelmandater trennen. Do wéisst ee jo och net richteg, wien een dann deeselwechten Dag a wéi ee Gremium géif stëmmen.

Den zweete Punkt, deen am Wahlgesetz och festgehalé gëtt, dat ass den Ufank an d'Enn vun der Chamber. Deeselwechten Dag gëtt déi al Chamber opgeléist wéi déi nei vereedeegt gëtt. Et gëtt kee Vide méi, e Vide, dee mer bis elo haten. De Rapporteur huet d'Iwwerleeungen, déi zu dëser Léisung gefouert hunn, an och d'Iddien, déi de Statsrot heizou hat, erläut-tert. Duerfir brauch ech dat och net nach eng Kéier ze maachen. A mir si schonn der Meenung, datt déi Léisung, déi mer hei grad hunn, an do schéngt mer eis jo och eens ze sinn an de Parteien alleguer hei, datt dat gutt ass, datt mer déi Onsécherheet, zum Beispill an engem Krisefall, datt mer déi aus der Welt schafen.

Och wa mer, wéi gesot, hei Datume réckele ginn, ass et awer och richteg, datt mer inhalt-lech näischt un de Konditiounen vun de Wahlen änneren. Dat ass och gutt gesot.

D'CSV enthält sech beim Artikel 4. Mir bedauer-en dat. D'CSV huet och gesot, mir hätten eis 2013-2014 net geäussert zu dësem Gesetz. Vlächit well mer eis et souwuel hätte kënne vir-stelle mat enger Wahl am Juni 2018 wéi och mat enger Wahl am Oktober 2018. Wou déi gréng allerdéngs ëmmer eng Ausso gemaach hunn, dat war, datt mer frou wieren, wann d'Europawahlen an d'Chamberwahlen net um selwechten Dag géife leien, well mer ëmmer d'Gefill hätten, déi eng Wahle géifen ënner-goen an der Debatt, déi mer dann am Land haten.

Dat gesot, Här President, wëll ech och nach dem Här Bodry Merci soe fir säi verfassungs-rechtlechen Iwwerbléck an och fir de Bléck an déi europäesch Länner. Do kéint ech dann nach aus eegener Erfahrung derbäisoen, datt de Lëtzebuerger Wahlsystem schonn ee ganz speziellen ass, well datt zum Beispill zwou Wahlen op engem selwechten Dag sinn, dat gesäit een an anere Länner ganz oft.

Wéi gesot, mir gi mat dësem Gesetz näischt in-haltlech änneren. An ech bréngen d'Zoustëm-mung vun der grénger Fraktioun zu deenen Ännerunge vu sämtlechen Artikelen, wéi se am Projet de loi stinn.

► **Plusieurs voix.** - Très bien!

► **M. Mars Di Bartolomeo**, *Président.*- Merci dem Här Adam. An d'Wuert huet elo den Här Gibéryen fir d'ADR.

► **M. Gast Gibéryen** (ADR).- Merci, Här Pre-sident. Och vun eiser Säit aus e Merci un de Kolleg Eugène Berger fir souwuel säi schrëft-leche wéi mëndleche Rapport.

D'ADR wäert dësem Gesetz zoustëmmen. Ech mengen, mir wëssen alleguer, wat fir eng Pro-blemer datt mer an der Vergaangenheet haten. Ech brauch se net méi ze erwänen, meng Vir-riedner hunn dat am Detail gemaach. A mir wëssen och, a wat fir eng Situatioun datt mer elo, wat d'Prozeduren ubelaangt, erakomm sinn doduerch, datt mer eben duerch déi virge-zunne Wahlen 2013 elo net méi konform zu der Constitutioun wieren, wa mer am ale Rhythmus géife bleiwen.

Ech brauch duerfir, wéi gesot, net méi op déi dräi éischt Artikelen anzegoen. Déi sinn zur Ge-nüge hei erkläert ginn. A mir sinn eis jo och, mengen ech, iwwer all Fraktiounen a Parteien eraus eeneg, fir dat esou ze stëmmen.

Wa mer am Fong kucken, wat maache mer? Mä mir wiesselen. Mir wiesselen, mir leeën d'Gemengewahle vum Oktober an de Juni a mer leeën d'Chamberwahle vum Juni an den Oktober. Derbäi kënnt natierlech dann, datt d'Gemengewahlen an dësem Fall e puer Méint no vir gezu ginn. Mir haten dat och schonn eng Kéier gemaach 2012, well do virdru sinn d'Periode vun de Gemengeréit ëmmer den 1. Januar ugelaft. An do hu mer d'Gesetz geännert an dunn ass gesot ginn, d'Gemengeréit lafen direkt un, nodeem datt den Innenminister de Buergermeeschter vereedeegt huet, an de Buer-germeeschter dann d'Schäffen an d'Conseille-ren, soudatt mer vun do un am Fong och déi éischte Kéier d'Mandater verkierzt hunn.

An dat war deemools emol nach guer net esou kloer gesetzlech geregelt, well ech ka mech erënneren, et war a menger Zäit wéi ech als Buergermeeschter opgehalen hunn, an duerfir feele mer a menger Carrière annerhallwe Mount. Mä mir haten deemools eng Nomina-tioun vu sechs Joer kritt! An deen neie Buerger-meeschter ass awer schonn am Oktober veree-degt ginn, an ech hat eng Nominatioun vu sechs Joer deemools. An dunn ass doriwwer diskutéiert ginn. Do ass gesot ginn: „Oh, mir ginn dovun aus, datt kee Problemer mécht“, well soss hätte mer am Fong zwee Buerger-meeschtere gehat während e puer Wochen...

► **Une voix.** - Fir esou eng grouss Gemeng.

► **M. Gast Gibéryen** (ADR).- ...fir esou eng grouss Gemeng. Mä och méi klenger hätten déi Situatioun kënne kréien,...

(Hilarité)

...net nëmmen eng vun deene gréissten aus dem Land oder virun allem eng vun deene beschten aus dem Land, mä och aner Ge-mengen hätten dat kënne kréien. Mä an dësem Fall ass et awer geregelt. An dësem Fall ass et elo kloer geregelt, datt d'Mandater nëmme bis deen Datum ginn. A mir kréien also net esou eng Situatioun.

Wat ech just wëll domat soen, dat ass, well ver-schidde Leit elo hei an d'Diskussioun erabrén-gen, datt e Mandat géif gekierzt ginn: Dat hu mer och scho virun zwielef Joer gemaach! An ech mengen, et war deemools och ee vun der CSV - wann ech mech net iren - Innenminister, wéi mer dat Gesetz gestëmmt hunn. Duerfir, wéi gesot, mengen ech, solle mer dat heite ge-sinn.

Dat Eenzezt, wat eis elo ka geschéien, dat ass, datt eventuell nach eng Kéier am Juni..., mat

den Europawahlen hu mer dat net esou richteg mat berücksichtegt, well bis elo d'Europawah-len och an de Juni falen, datt mer eventuell kéinten eng Kéier do zesummestousse mat den Europawahlen, well déi sinn am Juni bis elo nach ëmmer gewiescht a wäerten dat och an Zukunft sinn, well mir hu se mat de Chamber-wahlen ëmmer zesammen organiséiert.

Et kann natierlech och kommen, wa mer erëm eng Kéier eng Regierungskris krite a mir krite déi am Fréijoer, da wäre mer erëm an enger äänlecher Situatioun. Dat heite Gesetz fonc-tionnéiert méi laang, wa mer keng Regierungskris kréien. Duerfir kann een nëmmen an d'Zu-kunft d'Regierungen invitéieren, wa se schonn an eng Situatioun kommen, wou se ophale mussen, well et einfach net méi geet - mir hoffe jo elo, datt dat mat där heiten elo net méi geschitt -, mä datt se da vlächit kucken...

► **M. Mars Di Bartolomeo**, *Président.*- Nom Kalenner.

► **M. Gast Gibéryen** (ADR).- ...nom Kalen-ner. Entweder nach e puer Wochen aushalen oder e puer Wochen eben éischter briechen,...

(Hilarité)

...fir datt mer net duerno erëm an déiselwecht Situatioun kommen, fir datt mer dann awer erëm d'Chamberwahlen am Juni hätten. Da misste mer d'Gesetz erëm änneren. An da géife mer zu de Gemenge soen: „Ma elo musst Dir erëm am Oktober viele goen, well mir am Juni elo erëm d'Chamberwahlen hunn!“ Dat heescht, dat hei fonctionnéiert alles genausou gutt, wéi dat virdru fonctionnéiert hat, bis mer eng Kéier eng Regierungskris haten. An do hu mer eis jo missen upassen.

Mir müssen eist Reglement, de Kolleg Bodry huet et gesot, och nach upassen. Mir kucke muer de Mëtten an der Reglementscommis-sioun, ob mer do eng Léisung fannen. Dat wäerte mer scho fannen. An da kann et scho sinn, datt mer d'nächst Woch hei vlächit an der Chamber kënne och eist Reglement esou upassen, datt et dann am Gläichgewicht mat deem Gesetz ass, wat mer haut hei diskutéie-ren.

Wéi gesot, mir wäerten als ADR dësem Gesetz zoustëmmen. Mir waren och eng vun deene Parteien, déi ëmmer gesot hunn, mir hätte gä-ren d'Europawahlen an déi Nationalwahle getrennt. Dank der Regierungskris hu mer dat da kritt. Also, et ass näischt esou schlecht, datt net och eppes Guddes un esou eppes dru wier. Sou hu mer dann elo déi Trennung kritt.

Ech mengen, wa mer elo dee méi breeden De-bat féieren iwwert d'Wahlgesetz am grouss Ganzen..., ech mengen, mir hunn an de leschte Woche viles driwwer diskutéiert. An de Kolleg Bodry hat jo och deementsprechend eng Question parlementaire gestallt iwwert déi Leit, déi, obscho mer d'Wahlpflicht hunn, net viele ginn, wat hei zu Lëtzebuerg am Prinzip stillschweigend esou akzeptéiert gëtt a wou mer dann dovun ausginn, wa mer de Wee vun der Bréifwahl an esou viru méi fräi maachen, datt mer do een Deel vun deene Leit kréien, a sécherlech och een Deel vun deene Leit, déi dat zwar haut scho kéinte maachen, déi iwwer 75. Wann dat vereinfacht gëtt, wäert och vlächit en Deel vun de Leit iwwer 75 da méi nach un de Wahle participéieren, obscho se et net müssen.

Et ass och eng aner Diskussioun, wou mer géife mengen, datt een déi sollt mat an d'Diskus-sioun eranhuelen. Mir wëssen, datt dat zwar och net esou einfach ass. Mä d'Diskussioun vun de Wahlbezierker! Ech mengen, mir hu perma-nent och heibannen an dobaussen an der Éffentlechkeet d'Diskussioun vun ee Wahlbe-zierk oder déi véier Wahlbezierker bäibehalen. Bei den Europawahle fonctionnéiere mer mat engem Wahlbezierk a bei de Chamberwahle fonctionnéiere mer mat véier Wahlbezierker.

Mir kennen alleguer déi Diskussiounen, déi an der Vergaangenheet gelaf sinn an déi nach ëm-mer doruechter lafen, datt dat einfach net de Regeln alleguer entsprécht an datt kleng Be-zierker engersäits benodelegt ginn. Mir wës-sen awer och, datt et Diskussiounen gëtt, wa mer ee Wahlbezierk hunn, datt dann e klenge Bezierk vlächit net méi d'Garantie huet, mat esou vill Deputéierten an der Chamber vertrat-t ze sinn. Dat ass alles theoretesch. Dat kann een net soen. Dat hânt natierlech ëmmer vun de Kandidaten of.

Mä sécher ass et awer, datt mir jo heibannen alleguer net d'Interesse vun engem Bezierk ze verrieden hunn. Mir hunn d'Interesse vun der Gesamtheit vum ganze Land hei ze verrieden. An duerfir stellt och déi Fro sech, ob et richteg ass, nach bei de véier Wahlbezierker ze bleiwen. A mir als ADR wären Demandeur der-fir, wa mer schonn déi Diskussioun iwwer eng gréisser Reform vum Wahlgesetz féieren, dann och déi Iwwerleeung an déi Diskussiounen ma-eranzeeien.

Dat gesot, Här President, géif ech nach eng Kéier d'Zoustëmmung vun eiem Grupp fir dëst Gesetz bréngen.

► **Plusieurs voix.** - Très bien!

► **M. Mars Di Bartolomeo**, *Président.*- Merci och dem Här Gibéryen. A leschte Riedner ass den Här Marc Baum fir déi Lénk.

► **M. Marc Baum** (*déi Lénk*).- Merci, Här Pre-sident. Ech mengen, dat wat déi meescht Leit dobaussen no dëser Debatt wäerte kënne ma-huelen, dat ass, datt wahrscheinlech an enger Véierelstonn kloer ass, datt de 14. Oktober d'nächst Joer gewielt gëtt, wat bis elo esou an där doter Form net kloer war.

Déi Diskussioun, déi mer féieren - meng Vir-riedner si schonn drop agaangen - geet eigent-lech zrëck op zwou Saachen: éischstens, de Widersproch tëschent dem Wahlgesetz, dem aktuellen Text vum Wahlgesetz an der Verfas-sung, der Dispositioun vun eiser Konstitutioun. Den Här Bodry ass ausféierlech drop agaangen. Och deen eigentlech an der Vergaangenheet relativ laxen Émgang mat eiser Verfassung fänt un... oder ass hei een Element, woumat mer ophalen.

Déi Diskussioun ass awer och doduerjer zustane komm, datt mer Neiwwahlen haten. An och duerch déi Aart a Weis, wéi déi Neiwwahlen zu-stane komm sinn, hu mer 2013 festgestallt, datt ab deem Moment, wou den deemolege Premierminister hei ugekënnegt huet, datt en elo bei de Grand-Duc géif goen an dee géif froen, fir d'Chamber opzeléisen, datt ab deem Moment d'Chamber opgeléist war an et awer gläichzäitig eng geschäftsféierend Regierung ginn ass, déi weider agéiere konnt ouni d'Kontrollfunktoun vun der Chamber, datt heescht, eng Regierung ouni Parlament.

Dat huet e strukturell ondemokratesche Cha-rakter. A mat dësem Gesetz gi mer géint dës Praxis vir. Mat deem enge Bemoll, deen och schonn ugeschwat ginn ass, dat ass deen: Wann elo erëm eng Kéier virgezunne Wahle wieren, vu datt eis Verfassung am Moment op deem Punkt nach ëmmer virgesäit, datt de Grand-Duc deen ass, deen d'Dissoluitioun pro-klamiert an datt verschidden aner Paragrafe vun der neier Verfassung net ëmgosat ginn, dann ass et den Arrêté, deen den Datum fest-setzt vun der Sortie vun den Deputéierten, also wéi laang d'Chamber nach a Funktioun ass. A bei deem Datum ass de Wonsch natierlech grouss, datt dee relativ no bei den Neiwwahlen ass. Mä dat ass net sécher.

Deen drëtten Punkt, deen och elo hei ausibeg diskutéiert ginn ass, deen awer och, mengen ech, positiv ass, ass déi ganz Fro vum Zesum-mefale vu Wahlen. Wéi eng ganz Rëtsch aner Parteie ware mir och ëmmer der Meenung, datt et net glécklech ass, datt d'Europawahlen an d'Chamberwahlen op deemselwechten Dag stattfonnt hunn, aus deem einfache Grond, well doduerjer d'Europawahlen an déi euro-päesch Froen an Debatten, déi dorunnerhän-ken, strukturell u Wäert verluer hunn, well den Haaptfokus natierlech op de Legislativ-, op de Chamberwahle geleeën huet.

Wann et elo zu enger Situatioun, wéi se 2023 méiglech wier, erëm géif kommen, datt d'Ge-mengewahlen an d'Chamberwahle géifen ze-summefalen, dann ass d'Gefor natierlech och do, datt eng vun deenen zwou an deenen éffentlechen Debatte géif ënnergoen. A vu datt déi meescht Debatte mediatiséiert sinn, wieren dat wahrscheinlech d'Gemengewahlen, wou et och ëm aner Sujete geet wéi an den National-wahlen. Duerfir fanne mer de Prinzip och gutt, datt een hiegt an déi zwou Wahle vuneneen trennt.

Mir sinn awer prinzipiell der Meenung, datt, wann ee schonn un den Artikel 186 vum Wahl-gesetz erugaangen ass, een hält kënne méi konsequent sinn an d'Mandatsperiod, d'Dauer tëschent de Gemengewahle konsequent re-duzéieren op fënnef Joer, datt dat d'Regel wier, wéi laang eng Mandatsperiod vun de Gemen-geréit dauere soll.

Dat aus e puer Grënn: éischstens, well mer, wa mer en europäesche Verglach maachen, ge-sinn, datt déi Dauer vu sechs Joer eng éischter ausseruerdentlech héich ass. D'Regel euro-pawäit, wat d'kommunal Demokratie ugeet, ass éischter véier oder fënnef Joer. A mir mengen och, datt doduerch, datt d'Leit all fën-nef Joer hire Gemengerot viele kéinten, d'kom-munal Demokratie u sech scho géif kënne ge-stärkt ginn. Duerfir menge mer, datt déi Pe-riod vu fënnef Joer, datt dat eng Debatt ass, déi awer och an Zukunft nach muss weiderge-fouert ginn.

A mir hätten an deem heite Fall och méi e propperen Zyklus. An deem Fall wier et esou gewiescht, datt 2022 Gemengewahle ge-wiescht wieren, 2023 Chamberwahlen an 2024 Europawahlen. An ausser am Fall vu virge-zunnenen Neiwwahle wier dat en Zyklus gewiescht, dee sech iwwer Joren hätt kënne





weiderzéien, wou och net, wat elo Gefor leeft ze entstoën, Situatiounen komm wieren, wou véier Joer hannerteneen iwwerhaapt net gewielt gëtt, weder kommunal nach national nach bei den Europawahlen. Tëschent 2019 an 2023 si véier Joer, wou net gewielt gëtt. An datselwecht nach eng Kéier tëschent 2024 an 2028. Och deem hätt ee kënne mat eiser Propos entgéintwierken.

Dëst gesot, Här President, menge mer awer, datt d'Gesetz u sech e Fortschrëtt duerstellt, e Fortschrëtt par rapport zur aktueller Situatioun an och e Fortschrëtt par rapport zur aktueller Handhabung. An duerfir wäerte mer dat Gesetz hei och matstëmmen.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Baum. Domat si mer um Enn vun der allgemenger Diskussioun. An d'Wuert huet elo den Här Premier- a Staatsminister.

## Prise de position du Gouvernement

► **M. Xavier Bettel, Premier Ministre, Ministre d'État.** - Här President, ech wëll och fir d'Éischt dem Rapporteur Merci soe fir d'Erklärungen. Ech mengen, vill Virriedner hu schonn eng ganz Rei Saache vun dësem Projet soulevéiert.

Eppes steet fest, de Statsrot seet et och, dass e Mandat vun Deputéierten - nach eng Kéier: duerch d'Verfassung, deen Text, deen déi héchste Valeur huet am Land - fënnef Joer dauert. Deen héchsten Text, d'Verfassung, seet: „fënnef Joer“, keent méi. Selbstverständlech, et kéint manner sinn, mä net méi. Manner wier, wann eng Chamber opgeléist géif ginn.

Während mer bis elo gewinnt waren, dass spéitstens um Wahlsonndeg d'Parlament opgeléist ginn ass an dass mer dann am Fong um Wahlsonndeg eng nei Chamber gewielt hunn, wou mer dann awer kee fonctionnsfäegt Parlament haten, bis déi 60 Deputéiert vereedeegt gi sinn, féiere mer mat dësem Gesetz am Fong de permanente Charakter vun der Chamber an. An ech mengen och, dass dat e ganz wichtege Punkt ass, an ech soen och der Kommissioun Merci fir déi konstruktiv Aarbecht, déi hei gemaach ginn ass.

An Zukunft wäerte mer also am Normalfall ni méi ouni Chamber dostoen. Ech ka mech erënnere, wéi mer hei waren a wéi d'Chamber opgeléist gi war, wou du grouss Froe waren, wou hei e bësse Panik am Haus war, well mer net méi woussten, wéi mer sollte weiderschaffen. An ech ka mech erënnere, wéi mer ënnert dem President Mosar all zesummekomm sinn, fir ze kucken, wéi maache mer elo weider, well keen eng Anung hat, wéi mer iwwerhaapt sollten an esou enger Situatioun zesummeschaffen. Duerfir fannen ech et och wichtege, dass mer hei dës Schrëtt maachen.

Et ass och eng Demande vun all Partei gewiescht, fir d'Europawahlen an d'Chamberwahlen ze trennen. Dat ass eng Realitéit gewiescht mat deene virgezunne Wahlen an ech mengen, dass dat och elo definitiv wäert sinn.

Elo zu deem leschte Punkt, wou gesot ginn ass, dass mer d'Gemengevertrieeder e bësse géifen iwwerrasche mat engem Text, deen elo géif kommen: Deen Text hu mer jo net no de Gemengewahlen, Här President, deposéiert. Et ass jo net, wéi wann deen Text an deem leschte Mount, also säit dem Oktober, wou d'Gemengewahle waren, deposéiert gi wier. Deen Text ass den 28. Oktober 2016 (veuillez lire: 18. November 2016) deposéiert ginn an der Press virgestallt ginn - an der Press virgestallt ginn! -, wou mer kloer gesot hunn, dass, well mer all drësseg Joer déi zwou Wahle riskéieren ze hunn, eben d'Gemengemandat méi kuerz soll sinn. Dat heescht, et ass net, dass mer deen een oder deen aneren hätte wëllen iwwerraschen.

Den Depot war den 18. November 2016 an den Avis vum Conseil d'État vum Mäerz 2017, et war eng Kommissioun den 22. Mäerz 2017, den 29. Mäerz 2017 an den 3. Mee 2017. Dat heescht, et ass net, wéi wann ni iwwert deen dote Punkt geschwat gi wier an der Éffentlechkeet. Ech mengen, dass och de Gemengeconseiller elo net iwwerrascht wier, wann en dat dote géif gewuer ginn. Wéi gesot, den Text ass schonn deposéiert ginn an et war fir eis wichtege, fir dat esou ze maachen.

Firwat maache mer dat, Här President? Ech wëll just drun erënnere, um wivill Auer mer déi lescht Resultater hate virun e puer Woche bei de Gemengewahlen. Dat heescht, mat wat fänke mer un? Da gëtt ausgezielt. Mir bréngen et net fäerdeg, an engem Dag, wou d'Wahlbüroen um zwou Auer zoumaachen, owes déi definitiv Resultater alleguerten ze hunn, well d'Leit och vill panachéieren et cetera, et cetera.

Dat heescht, mir géifen da Chamberwahlen a Gemengewahlen deeselwechten Dag hunn.

Mat wat fänke mer un? Wou ginn d'Plakater opgehaange vun deem engen a vun deem aneren? Wou fënnt den Debat statt, deen demokrateschen Debat, dee wichtege ass? An duerfir si mer wierklech der Meenung, dass een all 30 Joer soll evitéieren, dass et zu esou enger kokasser Situatioun kënnt.

Ech hunn lech gesot, de Wahlsonndeg gi ronn 260.000 national Wielerstëmmen deposéiert. An dann hu mer och nach Wahlbüroen, wou jo bei de Gemengewahlen d'Netlëtzebuerger wienle däeren. Dat heescht, déi däerfen dann an d'Wahlbüro goen, mä déi hunn dann eng Urn, wou se däerfen en Ziedel ofginn, an eng aner, wou se da bei de Chamberwahlen net däerfe wienle, well se jo nëmmen däerfe fir déi eng an net fir déi aner wienle.

Duerfir si mer och der Meenung,...

► **Une voix.** - Do hale mer eis dëst Joer och nach net drun.

► **M. Xavier Bettel, Premier Ministre, Ministre d'État.** - Duerfir si mer der Meenung, dass et wichtege ass, dass d'Wahlen hei getrennt ginn. Ech gesi just, dass vun der CSV ech haut ebe matgedeelt kréien, dass se domadder e grouse Problem hunn. Nach eng Kéier, Här President: Den Text ass am November 2016 deposéiert ginn. Et ass keng Iwwerraschung. Dat wat priméiert, d'Mandat vum Deputéierten, ass duerch d'Verfassung virgesinn. D'Gemeng ass duerch d'Gemengegesetz virgesinn. An duerfir ass et wichtege, dass mer dës Annerungen haut maachen, fir dass kee Vakuum am Parlament bleift, mä virun allem och, fir dass mer evitéieren, dass mer Wahlen hätten, wou mer et net géife fäerdegbréngen, bannent annerhallwem Dag oder zwee Deeg iwwerhaapt Resultater ze kréien.

► **Une voix.** - Très bien!

► **M. Mars Di Bartolomeo, Président.** - Merci. Vu dass mer den Antrag vun de Kollege vun der CSV hunn, fir separat iwwert den Artikel 4 ofzestëmmen, géif ech lech virschloen, dat elo direkt ze maachen. Merci.

## Vote séparé sur l'article 4 du projet de loi 7095

Déi, déi fir den Artikel an der jëtzege Form sinn, stëmmen mat Jo, an déi, déi dergéint sinn, mat Nee. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo eriwwer.

37-mol Jo, 23-mol Nee, domat ass den Artikel 4 an der jëtzege Form bestätegt.

Ont voté oui: MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen (par M. Roger Negri) et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lambert, Edy Mertens et Mme Lydie Polfer (par M. Gusty Graas);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini (par M. Claude Adam);

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen (par M. Laurent Mosar), M. Paul-Henri Meyers (par M. Claude Wiseler), Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par Mme Octavie Modert), Claude Wiseler, Michel Wolter et Laurent Zeimet.

Mir géifen dann direkt zur Ofstëmmung iwwert den Ensembl vum Projet de loi 7095 iwwer goen.

## Vote sur l'ensemble du projet de loi 7095 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An och hei ass d'Ofstëmmung elo eriwwer.

37-mol Jo, 23 Abstentiounen, domat ass de Projet de loi ugeholl.

Ont voté oui: MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen (par Mme Taina Bofferding) et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lam-

berty, Edy Mertens et Mme Lydie Polfer (par M. Max Hahn);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini (par M. Claude Adam);

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Se sont abstenus: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen (par M. Marc Spautz), M. Paul-Henri Meyers (par M. Claude Wiseler), Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par Mme Octavie Modert), Claude Wiseler, Michel Wolter et Laurent Zeimet.

Ass d'Chamber bereet, d'Dispens vum zweete Vott ze froen?

(Assentiment)

Merci. Dann ass dat esou decidéiert.

An ech géif lech da proposéieren, fir elo iwwert d'Motiounen a Projeten ofzestëmmen, déi mer gëschter diskutéiert hunn. Ech gi jo dervun aus, dass d'Motiounen diskutéiert sinn. Wann dat net de Fall wär, da maacht Der mech dorop opmierksam.

Als Éischt géife mer iwwert d'Motioun N°1 ofstëmmen, déi vum Här Fernand Kartheiser beim Debat iwwert den Développement abruecht ginn ass.

(Brouhaha)

Soll ech nach eng Kéier ufänken?

► **Plusieurs voix.** - Nee.

## 4. Débat sur la politique de coopération au développement et de l'action humanitaire (suite)

### Motion 1

► **M. Mars Di Bartolomeo, Président.** - Mir géifen iwwert d'Motioun vum Här Kartheiser ofstëmmen, déi hie gëschter beim Debat iwwert den Développement abruecht huet a wou et ëm de Schutz vum Liewen an der Gesondheet vu Kanner an hire Mammen am Kader vun der Entwécklungspolitik geet. Kann ech dovunner ausgoen, dass d'Motioun diskutéiert gouf?

(Brouhaha)

Gutt. Dann, wann den Auteur do dermat d'accord ass, da stëmmen mer of.

### Vote sur la motion 1

De Vott fänkt un. Fir d'Éischt déi perséinlech Stëmmen. Dann d'Procuratiounen. An och hei ass d'Ofstëmmung elo eriwwer.

3-mol Jo, 57-mol Nee. Domat ass d'Motioun ofgeleent.

Ont voté oui: MM. Gast Gibéryen, Fernand Kartheiser et Roy Reding.

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen (par M. Marc Spautz), M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par Mme Octavie Modert), Claude Wiseler, Michel Wolter et Laurent Zeimet;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen (par Mme Taina Bofferding) et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lambert, Edy Mertens et Mme Lydie Polfer (par M. Max Hahn);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini (par Mme Josée Lorsché);

MM. Marc Baum et David Wagner.

Da komme mer zur Motioun, déi den Här Laurent Mosar gëschter abruecht huet iwwert déi grujelech humanitär Kris am Jemen.

## 5. Motion de M. Laurent Mosar relative à la crise humanitaire en République du Yémen (suite)

An och hei, mengen ech, ass d'Diskussioun gelaf. Kënne mer hei à main levée ofstëmmen?

Well ech mengen, dass et hei zu Recht e Konsens gëtt an der Chamber.

Sidd Der d'accord mat der Main levée?

(Assentiment)

### Vote sur la motion

Wien ass fir d'Motioun?

Géigeprouf: Wien ass dergéint?

Gëtt et Enthaltungen?

D'Motioun, déi vum Här Mosar abruecht ginn ass an och vun der gesamter Kommissioun gedroen ass, ass domat eestëmmeg ugeholl.

## 6. 7143 - Projet de loi modifiant la loi modifiée du 6 janvier 1996 sur la coopération au développement et l'action humanitaire (suite)

Dann hu mer de Projet de loi 7143 an och do war alles diskutéiert an ech stellen de Projet dann elo zum Vott. Dat ass de Projet iwwert d'Kooperatioun an den Développement.

### Vote sur l'ensemble du projet de loi 7143 et dispense du second vote constitutionnel

An d'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo eriwwer.

57-mol Jo, 3-mol Nee. Domat ass de Projet de loi ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen (par Mme Nancy Arendt), M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par M. Claude Wiseler), Claude Wiseler, Michel Wolter et Laurent Zeimet;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen (par M. Roger Negri) et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lambert, Edy Mertens et Mme Lydie Polfer (par M. Gusty Graas);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini (par Mme Josée Lorsché);

MM. Marc Baum et David Wagner.

Ont voté non: MM. Gast Gibéryen, Fernand Kartheiser et Roy Reding.

Ass d'Chamber d'accord, fir d'Dispens vum zweete Vott ze beantragen?

(Assentiment)

Merci. Dann ass och dat esou decidéiert.

Ech hoffen, dass ech elo näischt vergiess hunn. Da géife mer zum nächste Punkt vum Ordre du jour kommen. Dat ass de Projet de loi 7186, eng Ofännerung vum Gesetz iwwert de Logement, an et betrëfft de Mietzuschuss. An d'Wuert huet direkt de Rapporteur, den honorebelen Här Max Hahn. Ech hunn e bëssen Zäit gewonne fir lech. Här Hahn, Dir hutt d'Wuert.

## 7. 7186 - Projet de loi portant modification de la loi modifiée du 25 février 1979 concernant l'aide au logement

### Rapport de la Commission du Logement

► **M. Max Hahn (DP), rapporteur.** - Merci, Här President. D'Situatioun um Wunnengsmaart ass dramatesch. Dës Constat maache mir net eréischt säit Kuerzem, mä zanter ville Joren, Joren, an deenen d'Politik et net fäerdegbruecht huet, d'Logementsproblematik an de Grëff ze kréien.

Oft gëtt am Debat iwwert de Logement just iwwert de Verkaufspräis vu Wunnenge geschwat. Jo, mir sinn eng Eigentums-gesellschaft, an dat ass och gutt esou. An awer däerfe mir d'Aen net verschléisse virun der dramatescher Entwécklung, déi de Lëtzebuerger Wunnengsmarché och am Beräich vum Locatif duerchmécht. D'Loyere klammen op d'mannst genau esou séier wéi d'Verkaufspräisser. De Problem bleift ëmmer deen nämlechten: D'Offer u Wunnenge kënnt bei Wäitem net un d'Demande erun. A